

INUIT ATAQATIGIIT

Inatsisartuni



18. december 2018

Inatsisartut Suleriaasianni § 37 imm. 1 naapertorlugu Naalakkersuisunut apeqqut imattoq matumuuna saqqummiuppara.

Naalakkersuisunut apeqqut:

1. Ukiut tallimat kingullerni Nunatsinni ernumanermik isumatsassimangaarnermillu eqqugaasartut amerlassusaat Naalakkersuisut paassisutissiissutigisinnaavaat?
 - A. Paassisutissat pigineqarpata suaassuseq eqqarsaatigalugu arnat imaluunniit angutit sorliit ernumanermik isumatsassimangaarnermillu eqqugaanerusarpat?
 - B. Ernumanermik isumatsassimangaarnermillu eqqugaasartut qanoq ukioqqortussuseqarpat?
 - C. Ernumanermik isumatsassimangaarnermillu eqqugaasartut Nunap immikkoortuini suminngaanneernerusarpat?
2. Ernumanermik isumatsassimangaarnermillu eqqugaasareq sumik pissuteqarnersoq Nunatsinni misissuiffigineqarsimava?
 - A. Akissut aappiuppat, misissuineq qanga/qanoq ingerlanneqarsimava? Misissuinermi paasisat ilisimasallu suuppat?
 - B. Akissut naamiuppat sooq misissuineq ingerlanneqarsimangila?
3. Ernumanermik isumatsassimangaarnermillu eqqugaaneq pissutigalugu imminut toqunnissamut siorasaarisoqartartillugu nalunaarsuisoqartarpa?
 - A. Akissut aappiuppat: Ernumanermik isumatsassimangaarnermillu eqqugaaneq pissutigalugu imminut toqunnissamut siorasaarisimasut ukiut tallimat ingerlaneranni qanoq amerlatiginersut Naalakkersuisut paassisutissiissutigisinnaavaat? Suaassuseq ukiullu ilangullugit paassisutissutigineqarsinnaappat?
4. Ernumanermik isumatsassimangaarnermillu eqqugaasartut Nunatsinni isumaginninnermi tarnikkut ikornejarnissaminnut qanoq periarfissaqarpat?
5. Ernumanermik isumatsassimangaarnermillu katsorsaasinnaasut qanoq ilinniagaqarsimanissaat piumasaqaataava?
6. Ernumanermik isumatsassimangaarnermillu eqqugaasartunut pinaveersimatitsisinnaasut katsorsaasinnaasullu ilinniarluarsimasut Nunatsinni naammattut pigineqarpat?

- 7. Ernumanermik isumatsassimangaarnermillu eqqugaasartut kommunini isumaginnittooqarfinni aammalu Ilaqtariit Illuini sullinneqarnerisa ataqatigiissagaanerat pillugu Naalakkersuisut nassuaateqarsinnaappat?**
- 8. Ernumanermik isumatsassimangaarnermillu eqqugaasartut pilligit suliat kommunini aammalu Isumaginninnermut Inatsisinillu Atuutsitsinermut Naalakkersuisoqarfimmit nalunaarsorneqartarpat?**
- 9. Ernumanermik isumatsassimangaarnermillu eqqugaasartut pilligit Naalakkersuisut iliuusissatut pilersaarummik suliaqarnissaminnut pilersaaruteqarpat?**
- 10. Ernumanermik isumatsassimangaarnermillu eqqugaasarneq pinaveersimatinniarlugu Naalakkersuisut qanoq pilersaaruteqarpat?**

(Inatsisartunut ilaasortaq Aqqa Samuelsen, Inuit Ataqatigiit)

Tunngavilersuut:

Ernumaneq aammalu isumatsassimangaarneq imminnut ataqatigiissinnaanerat pissutigalugu apeqquteqaatini ataatsimoortinneqarput, taakkununngalu paassisutissat annertusumik paasiaqarfigerusunneqarlutik. Inuit kikkulluunniit ernumanermik isumatsassimangaarnermillu eqqugaasinnaapput. Ernumanermik isumatsassimangaarnermillu eqqugaasut inuuniarnerminni annertuumik ajornartorsiuteqalersinnaanerisa ilisimasaqarfiginissa pingaaruteqarpoq. Taamaattumik ernumanermik isumatsassimangaarnermillu eqqugaasartut eqqarsaatigalugit Nunatsinni kisitsisinik aammalu paassisutissanik erseqqinnerusunik peqarnissarput pinngitsoorneqarsinnaanngilaq. Inuit ernumanermik isumatsassimangaarnermillu eqqugaasartut sumi najugaqarnerat ilisimasaqarfigissallugu aamma pingaaruteqarpoq. Nunatta Avannaani kaperlattartumi inuit taarsiorneq pissutigalugu ernumanermik isumatsassimangaarnermillu eqqugaasassasut qularutissaanngilaq. Ernumanermut isumatsassimangaarnermillu eqqugaanissamut pissutaasinnaasut assersuutigalugu perioriartornermi aqquaarsimasat aammalu inuunerup ingerlanerani nalaassimasat qanoq sunniuteqartarnersut aamma paasiaqarfigissallugit soqutiginaateqarpoq.

Ernumanermik isumatsassimangaarnermillu eqqugaasartut eqqarsaatigalugit inuunermi alloriarteqqinnissaat anguniarlugu Nunatsinni tarnikkut ikorsiissutaasinnaasut suuneri paasiaqarfigerusunneqarput.

Ernumanermik isumatsassimangaarnermillu eqqugaasarnerup imminullu toqunnissamut siorasaarisarnerup imminut qanoq ataqatigiinersut ilanngullugu apeqqutigineqarpoq. Nunatsinni imminortarnerup imminullu toqunnissamut siorasaarisarnerup qaffassis orujussuunerannut ernumanermik isumatsassimangaanermillu eqqugaasarneq arlaatigut sunniuteqarsinnaasoq ilimagineqarsinnaavoq. Ernumanermik isumatsassimangaarnermillu eqqugaasartut ilaat sakkortuumik nalaataqarnermikkut imminut toqunnissaminnut siorasaaruteqartassasut ilimagineqarsinnaavoq. Taamaattumik ernumanermik isumatsassimangaarnermillu eqqugaasartut tarnikkut ikiorserneqartarnerat nukittorsarneqassappat pinaveersaartitsinissamut pilersaaruteqartoqarnissaa pingaaruteqarpoq.